

**Meeqqat ulloq unnuarlu angerlarsimaffiunut inissineqarsimasut qanoq akulikitsigisumik kommunit Naalackersuisullu inissiisuusimanertik tunngavigalugu nakkutilliartortutik misissuisarnissamik pisussaaffeqarnissaannik Naalackersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jane Petersen, Inuit Ataqatigiit)

### **Akissuteqaat**

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

### **Siullermeerneqarnera**

Aalajangiiffigisassatut siunnersuummut uunga meeqqat inuusuttullu angerlarsimaffiup avataanut inissineqarsimasut nakkutigineqarnissaannut tikkuussisumut qujavunga. Naalackersuisut politikkerat qulakkiissallugu meeqqat inuusuttullu inissineqarsimasut sapinngisamik toqqissisimanarnerpaanik atugassaqaarnissaat, taamaammat pingaaruteqarpoq pissusiusunik nakkutilliinerup naammaginaruunissaa.

Inatsisitigut aalajangersagaqarpoq isumaginninnikkut ingerlatsinermi nakkutilliinissamik isumaginnittoqarfiup aqunneqarnissaa aaqqissuunneqarneralu pillugit Inatsisartut peqqussutaanni, isumaginninnermullu tunngasunik nakkutilliinermi nalunaarummi, kiisalu meeqqat inuusuttullu ikiorserneqartarnissaat pillugu Inatsisartut peqqussutaanni.

Isumaginnittoqarfiup aqunneqarnissaa aaqqissuunneqarneralu pillugit Inatsisartut peqqussutaanni nr. 11, 12. november 2001-imeersumi allassimasoqarpoq isumaginninnermi malittarisassat pillugit kommunit ingerlatsinerat Naalackersuisut nakkutigisassarigaat. Isumaginninnerup iluani nakkutilliinissaq pillugu Namminersornerullutik Oqartussat nalunaarutaanni nr. 6, 16. februar 2006-imeersumi aalajangersagaqarpoq nakkutilliinerup annertussusissaa qanorlu nakkutilliinissaq aalajangersagaallutik, tassanilu erseqqissarneqarluni nakkutilliinermi allaffissornikkut ingerlatsineq inissiisarfiillu ilanngunneqassat.

Nakkutilliinerup qanoq akulikitsigisumik pisarnissaa pillugu nalunaarummi aalajangerneqarpoq Naalackersuisut nakkutilliillutik pulaarnissaat pisassasoq kommunalbestyrelsep qinigaaffiani minnerpaamik ataasiarluni. Tamanna aamma atuuppoq meeqqerivinnut kommunimi inissisimasunut, taakku ulloq unnuarlu meeqqeriviuppata meeqqeriviilluunniit allatut atortuugaluarpata.

Nalunaarummi aamma aalajangersarneqarsimavoq nakkutilliinermi aalajangersagaq immikkuullarissaq, tassani kommunalbestyrelse pisussaatinneqarpoq susassaqaarfiit akimorlugit suleqatigiinnissamik ataatsimiititaliaq aqutugalugu ulloq unnuarlu inissiisarfiit Namminersorlutik Oqartussat pigisaat ingerlataalluunniit nakkutigisagaat.

Meeqqat inuusuttullu ikiorserneqartarnissaat pillugu Inatsisartut peqqussutaanni nr. 1, 15. april 2003-meersumi aalajangersagaqarpoq kommunip pisussaaffigigaa nakkutigissallugit meeqqat inuusuttullu inuunermi atuagarisaat. Kommunip nakkutiginninnissaanut

ilaapputtaaq meeqqat inuusuttullu inissinneqarsimanertik pissutigalugu kommunimiittut. Nakkutilliineq timitalerlugu pulaarnikkullu ingerlanneqassaaq, taamaaliornikkut kommunalbestyrelsip siusinnerpaamik paasisinnaassammagu sumi meeqqamik immikkut tapersertariaqartumik pisariaqartitsisoqarnersoq.

Kommunit qanoq akulikitsigisumik nakkutilliisarnissaat pillugu aalajangersagaqanngilaq.

Naalakkersuisut siunnersuuteqartoq isumaqatigaat, kommunit nakkutilliinissaat pillugu aalajangersimanerusunik aalajangersaasoqartariaqartoq, tassungalu ilanngullugit pulaarluni nakkutilliisarnert qanoq akulikitsigisariaqarnerinik. Taakku suliamut ilaareerput meeqqat inuusuttullu ikiorserneqartarnerat pillugu inatsisip allanngortinneqarnissaanut piareersaammi.

Inatsimmik nutarterinissaq ilaavoq Meeqqat toqqissisimallutik ineriartornissaannut suliniummi, inatsisissatullu siunnersuut piareersarneqarpoq UPA 2012-imi saqqummiunneqartussanngorlugu, 1. januar 2013-imi atuutilertussanngorlugu.

Naalakkersuisut ulloq unnuarlu inissiisarfinni nakkutilliinissamut aningaasaliissutissaattut 2011-mut aningaasanut inatsimmi ulloq unnuarlu inissiisarfinni marloriarluni nakkutilliinermik suliaqarnissamut aningaasaliisoqarsimavoq, tassami qulakkearniarneqarpoq suliassaqarfimmi uani nakkutilliinerup ingerlanneqarnissaa. Naalakkersuisut periarneq taanna pitsaalluinnartutut isumaqarfigaat, isumaqarlutillu ulloq unnuarlu inissiisarfinni nakkutilliinissamik qulakkeerinniffiususoq.

Aalajangiiffigisassatut siunnersuummi saqqummiunneqartumi aalajangersaaffigeqquneqarput nakkutilliilluni pulaartarnissat ikinnerpaaffilerneqarnissaat aamma kommunini ingerlatsisuusunit. Tamanna aningaasartornerunermik kinguneqassaaq, massakkullu taamaattunut aningaasaliisoqarsimanngilaq.

Naalakkersuisut suliniutigaat meeqqat inuusuttullu ikiorserneqartarnerannut malittarisassat malunnartumik pitsanngoriaateqarnissaat, aamma nakkutilliineq eqqarsaatigalugu.

Meeqqat inuusuttullu ikiorserneqartarnerat pillugu inatsimmik naleqqusaanissamut atatillugu siunnersuutip piareersarneranut ilaatinneqarpoq siunissami aningaasartuutigilerumaagassat pillugit KANUKOKA-lu aaqqiissuteqarnissaq.

Aningaasatigut malitsigiumaagassat taamaalillutik inisseriissapput inatsimmik naleqqusaanissap UPA 2012-umi suliassiissutigalugu saqqummiutinnginnerani. Taamaammat inatsisip allanngortinneqarnissaa Inatsisartut akuerissappassuk aningaasatigut malitsigiumaagassai Naalakkersuisut FFL 2013-imut inissereersimassavaat.

Qulaani oqaatigiumasat innersuussutigalugit Naalakkersuisut innersuussutigaat siunnersuut akuerineqassasoq.